

Lajčák se sastao sa Tihićem: Prudski proces mora biti finaliziran u parlamentu



Visoki predstavnik i specijalni predstavnik EU Miroslav Lajčák danas se u Sarajevu sastao sa predsjednikom SDA Sulejmanom Tihićem sa kojim je razgovarao o aktuelnim političkim prilikama u Bosni i Hercegovini, s posebnim osvrtom na realizaciju dogovora lidera HDZ BiH, SDA i SNSD iz Pruda te o prioritetima evropskih integracija, koji ponovo moraju zauzeti primat političkog djelovanja u BiH.

“Prudski proces je pozitivna stvar u političkom životu BiH nakon potpisivanja Sporazuma o stabilizaciji i pridruživanju. Prvenstveno, jer je to domaći proces dogovaranja i kompromisa koji za učinak ima jačanje države. Kao takav, prudski proces ima snažnu potporu međunarodne zajednice koja očekuje da se dogovori proizašli iz prudskog procesa realiziraju kroz parlamentarnu proceduru što je prije moguće. Parlamentarni proces nudi mogućnost i drugim političkim strankama da daju svoj doprinos rješavanju ovih ključnih pitanja. Tek nakon usvajanja ovih rješenja u parlamentu moći će se reći da je ovaj projekat uspješno priveden kraju” izjavio je visoki predstavnik i specijalni predstavnik EU Miroslav Lajčák.

Sadašnja blokada evropskih procesa je štetna za BiH, a posebno za njene građane. Evropska unija je spremna pomoći ali od BiH se zahtjeva jasna opredijeljenost procesu integracija gdje se BiH treba početi ponašati kao partner, a ne kao pasivni

promatrač. "BiH ne može tražiti kandidaturu za članstvo u EU, ili očekivati ukidanje viza, a da nema jasnih rezultata koji potvrđuju da institucije BiH ozbiljno shvataju svoje obaveze", zaključio je Lajčák.